

四庫全書

集部

欽定四庫全書

二妙集卷五

金 段克己

段成己 撰

絕句

九日山園小宴取五柳公采菊東籬下為韻賦

詩侑觴五首

以下克己作

世無李元膺誰容孔北海長歌歸去來籬菊無人采
古來賢哲人餓死填空谷清尊幸不空且醉籬邊菊

風雨山城暮黃花自滿叢幽懷若為寫正要玉西東
愛酒陶元亮持盃對菊枝醉時催客去猶復有藩籬
饑餐秋菊英采采不盈把日落西山昏獨坐衡門下

仲冬之初家弟誠之自芹溪得紅梅數枝作三
詩以見意夜歸枕上次韻簡山中二三子三首
十月梅花春未知竹間璀璨出斜枝耐寒巧作新粧面
絕勝含章簷下時

顏色馨香幾箇知叢篁深處見橫枝孤標祇得詩人愛

華樣而今不入時

梅格孤高只自知
恥隨桃李鬪新枝
天寒翠袖依修竹
却在橙黃橘綠時

盧希顏草蟲橫披

牛李黃蘆相並枝
秋蟲蕭洒弄幽姿
畫師老筆生新意
寫出無聲七月時

暮春有感三首

忙携歌酒趁清歡
桃李多能幾日看
欲識詩人愁絕處

花開時節一凭欄

春到蕪菁事已非
杜鵑看又喚春歸
幽香一點無尋處
燕蹴飛紅染客衣

及時行樂不應遲
管領風光更有誰
花落花開春又去
都能消得幾篇詩

翠微上人病間

嘆息維摩老病身
散花丈室久無人
呼兒却問文殊疾
公案而今特地新

梅花十咏

憶

姑射仙人冰雪膚
昔年伴我向西湖
別來幾度春風換
標格而今似舊無

夢

天仙邀我醉瑤臺
春向飛瓊笑裏回
為報梨花緣已斷
休將雲雨下山來

尋

風流誰似李三郎不記仙姿委路旁天上人間無覓處
風來羅幕只聞香

探

虢國夫人約素身不教脂粉浣天真一班曾向春前見
顏色如今更可人

乞

寄語詩人林隱君水西千樹要平分玉顏絳領堪娛老
御史何勞覓紫雲

折

白玉堂深夜色寒玉兒和月倚蓬山高情不似章臺柳
也許餘人取次攀

嗅

手撚冰蕤步月華暗香先已透垂瓜壽陽畢竟無才思
但卧含章拂落花

浸

玉骨渾將山麝薰冰肌得水更精神凌波微步東風軟

羞殺當年洛浦人

浴

脉脉晴天翠幕張
玉環月底按霓裳
却嫌塵污香羅襪
故著溫泉為洗粧

惜

窈窕銀屏掩畫堂
為嫌玉瘦怯昏黃
落英猶可為香熱
不學飄風老退房

花木八詠

海棠風

玉妃酒暈透香肌滿頰嬌紅睡起時小立沈香亭子外
釵橫髻亂任風吹

楊柳烟

舞罷霓裳醉似泥六宮誰敢鬪腰肢侍兒扶起嬌無力
雲母屏深午醒遲

荷葉露

仗下華清賜浴時溫泉香膩洗凝脂團花翠壁琉璃滑

狼藉珠璣醉不知

葵花日

晚日穿花透翠帷
環兒軟語訴分離
髮膚之外皆君賜
妾自傾心君不知

菊花霜

風簾斜揭玉鉤欄
端正樓高燭影殘
宿酒困人梳洗懶
從教殘粉浣金鈿

芭蕉雨

梨園子弟去無蹤
門掩蓬萊繡帳空
寂寞綠窻深夜雨
傷心不獨有梧桐

梅花月

蓬島春寒減玉肌
却憑羽客寄相思
凭肩私語長生殿
惟有當時好月知

山茶雪

娘子宮中儀體新
八姨羞把舊粧勻
畫羅瑞錦難相稱
故著龍香簇絳巾

退之留別大顛圖

吏部文章日月光平生忠義著南荒肯因一轉山僧語
換却從來鐵石腸

漢陰抱甕圖

鑿井為畦並漢臯區區抱甕不辭勞古人伎倆今人笑
舉世師師尚桔槔

丁未三月二十八日縣大夫薛君寶臣過余芹
溪精舍酒間雨作時方苦旱喜而賦之

麥田日日起黃埃官長憂民意不開底是山靈多嫵媚
故驅風雨過江來

明日李生湛然見和仍韻答之二首

東風吹雨細纖埃尊酒相逢盡日開不是官閑公事少
此中能得幾回來

日烘窻戶裊輕埃醉眼朦朧尚倦開不是故人留顧盼
衡門未省有人來

壽衛生襲之

去年即席賦新詩
今歲迎門把酒卮
似此相逢能幾度
莫教虛負百年期

為龍門史師壽不遇

香霧霏霏曉未開
一尊特地為君來
仙翁落魄知何處
貪醉蟠桃不肯回

楊生彥衡袖初夏三數詩過余徵和雖勉強應
命格韻枯槁深慚見知十首

枝頭梅子半傳黃
門巷陰陰午景長
為語兒童休報事

乃翁方且作詩忙

刁騷短髮半垂黃
深覺閑中氣味長
買得西山猶是錯
往來杖履却成忙

薔薇經雨隕輕黃
芍藥翻階竹筍長
年少往來長不住
恰如蜂蝶為花忙

案上新經未入黃
風簾不動篆烟長
須知靜裏乾坤大
不覺飛空日月忙

奏賦當年對赭黃
漁樵今日話偏長
青山綠水無窮意

信使人生空自忙

酒熟江村擘蟹黃
論詩看劍引杯長
閑身散懶無拘束
笑殺君房醉裏忙

老來閑口罷雌黃
書卷慵拈白日長
門掩東風無客過
不知人世有閑忙

不求紆紫與懷黃
竹杖芒鞋野興長
信步芹溪溪上路
楊花又是一番忙

晨興賞翫抵昏黃
晝短其如夜苦長
秉燭醉歸君莫怪

一生能得幾回忙

蟾蜍詎可逐飛黃雲海茫茫去路長
世外仙方無分得漫勞心力一生忙

送雙白渠使梁君二子北上

連壁雙飛二鳳毛眼明又復識英豪
鸞聲噦噦朝天日想有新詩奪錦袍

送故人子赴燕

莫謂城南尺五天此行幾日到幽燕
昂霄聳壑從茲始

萬里青雲穩著鞭

乘興杖屨山麓值梅始花裴回久之因折數枝
置之几側燈下漫浪成語簡諸友一笑云三
首 以下成已作

戲蝶遊蜂總未知小窻低亞雨三枝夜闌燈下橫疎影
渾似西湖月上時

漏泄春光人未知輕紅已透最高枝洗粧自有天然態
儘道冰容不入時

幽香不許俗人知，纔是東風第一枝。
誤認文君新睡起，讀書窻下立移時。

光得道中

行行不覺到斜陽，顧影頻驚爾許長。
返照此身還此是，莫因外景使承當。

和答陳子京二首

擾擾浮生等聚嬉，風波千丈渺無涯。
掩關一卷床頭易，冷眼從渠笑絕癡。

雲山咫尺阻同嬉
望斷音容天一涯
聞道城居最堪隱
想君為討未全癡

梅花十咏

憶

初謁瓊漿記昔年
迎門一笑想嫣然
夜來雪暗前村路
恨滿東風意不傳

夢

神女塵緣久未忘
飄然隨月到高唐
歡情未接還驚覺

雲雨陽臺空斷腸

尋

玉想形容霞想裾雲英自與世姬殊幾年來往藍橋路
鵲盡玄霜得見無

探

未嘗親到謝家堂風韻何由識謝娘說與選花場上客
須知林下勝閨房

乞

漏泄春光洛水傍
紫雲名字襲人香
可能惠我黃昏伴
休笑分司御史狂

嗅

玉骨那堪瘴霧傷
好將經卷伴南荒
坡仙鼻孔清如水
老覺朝雲道氣長

浸

洛浦飄飄信有神
凌波忽覩一枝春
摩挲老眼看微步
旖旎香生羅襪塵

浴

洗盡鉛華見玉環
肌膚冰雪照人寒
臨風脉脉嬌無力
輕裊香羅半未乾

惜

襟袂翛然風味酸
北人誰識蔡姬賢
可憐拋却清伊月
埋沒邊沙二十年

花木八詠

海棠風

宿酒微醒不自持
君王催喚太真妃
醉紅睡起依然在
忙倩羅紈為解圍

楊柳烟

九原喚起李夫人
誰炷仙香為返魂
一捻宮腰渾瘦損
舞衣微帶瑞雲痕

荷葉露

泉客將歸返故淵
西風渺渺碧波寒
主人情厚無他贈
一把真珠泣翠盤

葵花日

戀戀天光下玉階
明妃初出漢宮來
情知生死歸無路
一點芳心誓不回

菊花霜

六宮試手學梅粧
曾見飛英點額傍
香粉嚼餘濃不散
唾花誤染縷金裳

芭蕉雨

憶別春容已十年
回文錦就倩誰傳
都將一掬傷心淚

酒向蠻溪數幅牋

梅花月

別後盟言不忍寒
舊官到底勝新官
情緣未斷還相見
人復團圓鏡復完

山茶雪

飄飄天上謫仙人
嘗作金鑾侍從臣
老大風流殊未減
錦袍如舊白頭新

龍門八題

禹門雪浪

峽束洪流起怒濤
亂翻晴雪與雲高
徐看行處元無事
小處區區枉用勞

雲中暮雨

古壘雲藏一徑微
河山依舊昔人非
貪徵往古興亡事
不覺城頭雨濕衣

疏屬晴嵐

雲拖殘雨歛前峯
翠色寒光溢幾重
慮有詩人偏著眼

時施膏沐為渠容

雙峯競秀

雲外亭亭聳翠環
天荒地老兩峯間
若教工部嘗經眼
未肯將詩譽玉山

神谷藏春

山間草木四時新
一脈清溪不染塵
忽見漁郎驚借問
却疑儂是武陵人

仙掌擎月

月出山頭未數竿
仙人掌上玉團圓
瑞光冷射三千丈
絕勝碧蓮峰下看

姑山夕照

日鎖羣峯欲下遶
龍蔥一片冷胭脂
醉吟著我扁舟尾
畫出坡遊赤壁時

汾水秋風

一曲劉郎發櫂歌
歡情未已奈悲何
只今回首空陳迹
依舊秋風卷素波

蒲州八詠

蒲津晚渡

城下行舟一箭輕
城頭落日半竿明
河流洶洶風仍急
時聽浮空欸乃聲

虞坂晚行

林下晨雞第一聲
隴頭殘月伴人行
未知局促鹽車下
老驥蕭蕭又幾鳴

舜殿薰風

煩暑人間不可支
暫來侈殿獨委蛇
南風一拂清如水
猶似當年解愠時

首陽晴雪

薇歌一曲對西山
萬古清愁老翠巒
望斷空岩人不見
光搖銀海玉峯間

東林夜雨

烟雨濛濛暮靄凝
院庭深悄若無僧
林梢一點熒熒碧
知是層樓供佛燈

樓巖疊巘

山色熒青不染塵何年精舍構嶙峋也知偏入閑人眼
為現雲間清淨身

媯汭夕陽

媯水橋邊日下遲龍蔥一片冷胭脂山川良是風猶古
想像英皇下嫁時

王官飛湍

冷雲深處漾寒清千仞懸流玉練明車馬往來山下路

何人到此濯塵纓

幽居奉借邀庵尊兄嚴韻呈隱之潤之二英弟

一粟三首

解鞍借榻避風埃
淨拂風軒待我開
詩句墮前還忘却
聯書歲月記曾來

浮榮過眼等浮埃
尊酒相逢一笑開
門外紅塵高萬丈
莫教一點鬢邊來

小軒如斗靜無埃
面向青山好處開
漫道幽人招不得

一尊今日為君來

和李生湛然聞杜鵑有感之作

五更枕上夢魂清
初聽催歸第一聲
我本無家更安往
任渠啼血不關情

張信夫夢庵

并引

子張子寓跡於里西之精舍以夢名其室且
命余訂之夫人之方夢也念念相因萬境現
前一得其意則揚眉軒目傲然以為樂一失

其意則喪神沮氣愁悴以為憂昏昏沒沒冥
行於夢境之中初不知夢之為夢也惟其不
知也故為憂樂之所汨及渙然而覺始知向
之汨吾心者皆虛妄也世之人貪得而患失
廢精神耗思慮終日弊弊焉顛倒錯亂於憂
樂之域而不自覺悟者庸非夢邪蓋寐者歛
睫之夢也寤者瞠目之夢也是以達人大觀
寤寐兩忘雖視其人猶以夢幻況區區之物

烏足累其心哉姑作是詩而為之獻亦以自

釋爾四首

憶昔邯鄲道上行半生回首夢初驚而今始覺非真實
過眼浮雲萬事輕

覺時常笑夢時訛夢覺其間爭幾何聊爾藏身大槐國
閑看明月上南柯

一身栩栩復蘧蘧為蝶為周我自如寤寐人間等遊戲
此心無地不華胥

世味迷人人不知紛紛蕉鹿競爭為
山翁正坐山堂上
笑問黃梁第幾炊

和楊彥衡見寄之作六首

幾年奔走趁槐黃兩脚紅塵驛路長
夢破邯鄲成獨笑
半生回首只空忙

西風浩浩塞塵黃白髮緣愁若箇長
客夢五更驚忽斷
打門縣吏索租忙

一棗誰為製玄黃無可奈何秋夜長
我自忍窮方未暇

不知蠻觸戰爭忙

一葦初航十里黃故園歸計渺何長可憐兀兀青燈下
還似當年舉子忙

小園蘇茹待秋黃不事薑鹽味自長口腹累人良可笑
何能終歲為渠忙

幽跡無心學綺黃荒才涉世本非長年年來往燕然道
却為山林有限忙

古瓶梅花為總管李侯賦

錦帳銀瓶漫玉肌
風流應自有人知
夜深窻下橫疎影
絕勝西湖月上時

送馮資深歸西山五首

人間蠻觸日干戈
暮四朝三都幾何
此去莫憂瓶粟罄
西山雨足蕨薇多

蕭蕭華髮老書生
久欲歸田計未成
喜聽日邊消息好
故山容得子真耕

幾年思慮漫營營
重見西山眼倍青
宵次無塵元自好

床頭況有洗心經

候門稚子喜歸來
暖熱那無酒一盃
抖擻滿身塵土盡
襟懷還對好山開

別離最苦暮年時
百歲中來不易支
此去故園行樂處
詩成毋吝寄相思

徽宗墨竹

野禽背立歲寒枝
想見當年落筆時
吮墨綴辭俱喪國
九泉笑殺李家兒

贈師嚴卿

老大溪山入夢頻，憑圖畫寫情真歸與不及身。強健山有英靈恐笑人。

蘭氏自然齋

萬事榮枯一笑間，情知使尼定誰關。編茅依石寬如斗，卧看溪雲出岫還。

明皇蹴鞠圖

志在馳驅禍已胎，笑顏况更為誰開。貪爭飛鞠鞭驄去，

不覺踰垣有鹿來

周生景純贈菊數本因拾舊事依韻答之二首
陳國君臣醉宴時可憐璧月照瓊枝
薔薇露濕仙棠重
笑對君王索好詩

萬里文姬去國時秋霜已到歲寒枝
歸來滿面黃塵暗
恐入西風馬上詩

張世傑經歷牧牛圖三首

綠陰深處戲童兒牛自東西兒不知
休說兒童無伎倆

人間何事不兒嬉

斷烟荒草淡無姿
寫入人牛自在時
毀瓦一懽聊爾耳
不知何者是盈虧

兒自嬉遊牛自眠
葛洪磯畔舊因緣
三生石上精魂在
一夢回頭又幾年

楊茂之志適軒

坐笑行吟困即眠
心遊隨處莫非天
是中真意何人會
隱几蓬窻正惘然


人心自有一義皇說著元來話更長詩句墮前還忘却
坐看林影轉虛廊

秋日牡丹為友人賦病久無佳思姑作俳語三
章以應命對觴一呼盧可也

訴盡中情為雨詩可憐誰識漢文姬歸來已覺秋風曉
標格猶應似舊時

秋雨瀟瀟無限思妄憑羽客覓環兒蓬萊日月非人世
不記梧桐落葉時

公子初離季隗時丁寧私語兩心知從渠歲律春秋變
一點真心死不移



二妙集卷五

欽定四庫全書

集部

二妙集卷六至八

詳校官中書

臣

呂光復

助教

臣

常循覆勘

總校官中書

臣

朱

鈐

校對官中書

臣

朱

烜

謄錄貢生

臣

李學

瞻

欽定四庫全書

二妙集卷六

金

段克己

段成己撰

雜言

壽家弟誠之

以下克己作

贈君以湘山桃竹之杖酌君以崑丘玉液之泉泉以益
肺腑之清氣杖以扶貞節於暮年迺命童子敬設几筵
抽中山秋兔之毫舒浣花五色之綾滌端溪鼠肝之研

磨伊川老松之烟遂含情而抒思寫棟莠之新篇請君
聽我歌歌聲咽塞而不傳玉堂金馬在何處姑山汾水
空連綿世人所後我所先此生安得不迤邐但能道義
追淵騫何妨坐客寒無艷鳥栖深林魚泳淵膏以其明
還自煎文字點勘費丹鉛朝夕胡為粥與饅百年飄忽
如流川今日已覺昨日賢青州從事殊可憐徑須呼至
黃花前一酌入口百憂捐與君曝背同醉眠

朝采西山芹暮卧西山雲十年混跡鹿豕羣閉戶不出

避世紛囂中涇渭外不分鶴以聲自聞薰以香自焚續
經不用如河汾教子讀書事耕耘佇期道化行汝墳敲
門載酒米數君徑呼大白與策勲令徵前事兼論文奇
語間出張吾軍不覺庭柯暝夕曛爛醉西風樂我真雄
國有狗方信信

景純浩然見過徑飲成醉夜雨中作此近五鼓
月色滿空曉起書長語贈二子

退之方北歸見謁即成喜東坡還泗上鐸聲欣入耳而

況羈旅中解后遇知己東風淡蕩百草芳游絲飛絮白
日長一杯相祝對流水白酒微帶溪芹香漁歌樵唱競
相屬不覺半山無夕陽醉卧山堂聽山雨冰雪對床揮
夜語一燈照壁映悠悠恰似孤舟泛青楚夢回酒醒明
月高風雨向來無處所人生哀樂本皆空莫令身世如
飛蓬

贈醫者呼延生

并引

外醫之名非古也今人徒見瘡瘍發見於皮

膚之外針砭可得而攻之因謂之外醫然則
解肌剖腹湔洗腸胃漱滌五臟者其亦外醫
耶殊不知聽聲視色察氣觀脉以知病之所
在湯熨以治其腠理針石以達其血脉酒膠
以盪其腸胃扶虛疎實抑過補慊疾無不起
者今呼延生之療疾也湯劑砭熨各隨所施
無不立愈嗚呼非得之於內應之於外烏能
取效如此之速乎生喜飲酒人之所酬無厚

薄不以介意一寓之酒其真得於酒耶余賢
其為人故賦詩以贈之

君不見南齊潘聚師禁耳出箭鏑又不見唐人孫甌生
祝石使相擊祝溪溪不流徐登先破的以樹徒癰疽伯
宗多偉績後來便說呼延生神異一時無匹敵誓言拯
衆疾猶已有飢溺吐氣作雲霓掉舌飛霹靂炎涼隨手
變衆苦已蕩滌百謝不一顧黃金同瓦礫飲酒過百餘
醉不遺涓滴歸來掩關卧瑤琴閑掛壁所至以義合無

莫亦無適衡門時見過笑語慰岑寂却愁仙籍告功成
使恐人間無處覓

癸丑中秋之夕與諸君會飲山中感時懷舊情

見乎辭

少年著意做中秋手捲珠簾上玉鉤明月欲上海波濤
瑞光萬丈東南浮樓高一望八千里翠色一點認瀛洲
桂華徘徊初泛灩冷溢盃盤河漢流一時賓客盡豪逸
擁鼻不作商聲謳無何陵谷忽遷變殺氣黯慘纏九州

生民冤血流未盡白骨堆積如山立此來幾見中秋月
悲風鬼哭聲啾啾遺黎縱復脫刀戟憂思離散誰與鳩
回思少年事刺促生百憂良辰不可再尊酒空相對明月
恨更多故使浮雲礙照見古人多少愁懶與今人照興
廢今人古人俱可憐百年忽忽如流川三軍鞍馬閑未
得鏡中不覺摧朱顏我欲排雲叫閭闔再拜玉皇香案
前不求羽化爲飛仙不願雙持將相權願天早錫太平
福年年人月長團圓

史伯友好禮齋

禹門山壁石巖嵒驚濤拍岸石疑動奔騰西去疾於飛
千里一折不旋踵山水不得獨當奇異氣鍾人生將種
乃翁陰德及後昆墓木而今猶未拱大兒膂力號絕人
挾藥灣弧賈餘勇小兒精神大於身野鶴乘風欲高聳
人物風流此一時坐使山河價增重讀書已能了大義
稼穡還知依畝隴孰謂人間杞梓材肯與樗櫟同臃腫
良心一發不可遏油然而上若泉湧悅親誠身固有道

不得半友深自悚一毫驕氣不可作好禮名齋心益竦
數陳几席待佳士却歸門庭謝儿允善言亟聞聞必拜
未之能行後惟恐結穢何嘗愧古人親詣仍能越常奉
慎恭勇智咸有節人偽不私無所壅汝之所得亦已多
更須道義相切磋佳時勸客金叵羅主人起舞客齊歌
遯菴野瘦巽已瞻坐中不覺哀顏酡六龍冉冉奔羲和
年年事業毋蹉跎君其爲我疾揮魯陽戈我亦浼君顛
倒挽黃河他時策杖重來過更名此里爲鳴珂名與西

山俱不磨

飽食箴示同志二三子

飽食終日無所用心方寸之微萬慮來侵外物為誘內
即惱淫醉生夢死桎梏亦深夜氣不足弗違獸禽博奕
猶賢虛廢光陰凡百君子尚服攸箴

贈薛寶臣疎梅凍雀圖并以頌之

玄冥司候百卉具衰此花獨秀于江之湄傲雪凌霜冰
清玉潔孤根盤石凍柯浸月意彼寒雀婉姿相依飲香

啄蘗生死不離歲暮貞心粲粲清節孰與薦延移歸金闕鳳鳥不至惡木日滋窮通有命舍是奚為

陳丈良臣誕彌令日謹拜手而獻頌曰

矯矯夫君由義居仁風姿飄然野鶴孤雲古有逸士全具其真四海鼎沸克全厥身我知天意未喪斯文不辱其身不降其志道惟守一過能不貳明是辨非存真去偽淵明不仕豈其本意于嗟麟鳳不為世瑞蕭然環堵詩書自怡耕田而食紡績而衣素琴掛壁白酒盈卮動

容言行一國之師苟微斯人吾誰與歸

暇日意行姑射山下奉借遊菴先生夜堂聽雨韻

簡詩杜諸君

以下成已作

散策步幽巖所過良可喜戀戀蝶遶衣涓涓泉入耳俯
仰天地間一物莫非已暄妍坐閱春事芳飄飄思與春
風長呼兒置酒飲花下風來滿袖携花香白白紅紅紛
澗谷恍然身世如河陽東風吹落山頭雨山鳥催歸共
人語拂苔便欲枕流卧却恐傍人笑孫楚眼看六合塵

土滿歸袂翩翩去何所乘風更擬凌清空人間無處尋
方蓬

二妙集卷六

欽定四庫全書

二妙集卷七

金 段克己

段成己 撰

樂府

水調歌頭

癸卯八月十七日逆旅平陽夜聞笛聲有感

而作

以下克己作

亂雲低薄暮微雨洗清秋涼蟾乍飛破鏡倒影入南樓

水面金波灩灩簾外玉繩低轉河漢截天流桂子墮無
跡爽氣襲征裘廣寒宮在何處可神遊一聲羌管誰弄
吹徹古梁州月自於人無意又被月明催老今古共悠
悠壯志久寥落不寐數更籌

迎送神二詞為劉潤之賦二首

清秋好天氣未黍已登場群心思答神貺吉日復辰良
神既來兮庭宇颯颯西風吹雨仙仗儼長廊巫覡傳神
語出戶舞佺佺剗肥瓠漚桂酒奠椒漿一年好處須記

此樂最難忘風外淵淵簫鼓醉飽滿城黎庶健倒卧康
莊夜久群動息風散一簾香

雙龍隱扶輦千騎縱翔翔雲旌翠蕤摩蕩遙指白雲鄉
風馭飄飄高舉雲駕攀留無處烟霧杳茫茫小立西風
外似聽珮鏘鏘暮天長秋水濶遠山蒼歸途正遠明月
醉語說豐穰但願明年田野更比今年多稼神貺詎能
忘君可多釃酒吾復有新章

滿江紅

過汴梁故宮城二首

塞馬南來五陵草樹無顏色雲氣黯鼓鼙聲震天穿地
裂百二山河俱失險將軍束手無籌策漸烟塵飛度几
重城蒙金闕長戈裊飛鳥絕原厭肉川流血嘆人生此
際動成長別回首玉津春色早雕欄猶掛當時月更西
來流水遶城根空嗚咽

塵滿貂裘依舊是新豐羈客還感慨中年多病惟堪眠
食方寸玉階無地借詩書勲業休重憶況而今雙鬢已

成絲非疇昔興廢事吾能說今古恨空填臆向南風望
斷五絃消息眯眼黃塵無處避洗天風雨來何日待酒
酣慷慨話平生無人識

壽陳丈良臣

有媯之後國於陳慶流苗裔還世有異人間出簪纓不
替別派中分汾水右英靈吸盡姑山氣看鳳麟來應太
平期為佳瑞都未展經邦志醫與卜渾餘事把活人手
段此中聊試德義不孤朋友樂田園粗了兒孫計有髮

絲禪榻老生涯棲心地

夢菴張君信夫生朝

臘盡春來還又是新年入手人共喜丹山仙桂一枝初
秀轉首黃金都散盡酒酣彈鋏蛟龍吼想平生豪氣尚
依然銜星斗紅未透花枝瘦人不老花依舊老生涯正
要東山歌酒翠壁崢空山玉立長河瀉浪風雷走挽山
河勝槩入金樽為君壽

登河中鸛雀樓

古堞憑空烟霏外危樓高矗人道是宇文遺趾至今相
續夢斷繁華無覓處朱甍碧甃空陳跡問長河都不管
興亡東流急儂本是乘槎客因一念仙凡隔向人間顚
仰已成今昔條華橫陳供望眼水天上下涵空碧對西
風舞袖障飛鴻滄溟窄

衛生衛之壽

春色三分猶未一元宵才過行樂處軟紅香霧未收燈
火楊柳梢頭黃尚淺梅花萼底紅初破待東風吹綠滿瀛

洲愁無那無一物為君賀歌我志君須和問人生底事
必須奇貨好對青山傾白墮休嗟事業違人些怕他時
富貴逼人來妨高卧

清明與諸生登西磴栢崗

欲把長繩維白日暫留春住親友面一回相見一回非
舊擾擾膠膠塵世事不如人意十常九向斜陽無語倚
危樓空搔首活國手談天口都付與尊中酒這情懷又
是去年時候風外紛紛飛絮亂柳邊湛湛長江去問老

來還有幾多愁愁如許

遯菴主人植菊堦下秋雨既盛草萊蕪沒殆
不可見江空歲晚霜餘草腐而吾菊始發
數花生意淒然似訴余以不遇感而賦之
因李生湛然歸寄菊軒弟

雨後荒園群卉盡律殘無射疎籬下此花能保英英鮮
質盈把足娛陶令意夕食誰似三閭潔到而今狼藉委
蒼苔無人惜堂上客頭空白都無語懷疇昔恨因循過

了重陽佳節颯颯涼風吹汝意汝身孤特應難立謾臨
風三嗅遶芳叢歌還泣

重九日山居感興

五柳成陰三徑晚宦遊無味還自嘆迎門笑語久須童
稚歸去來兮尊有酒素琴解寫無弦趣醉時眠推手遣
君歸吾休矣富與貴非吾事貧與賤寧吾累步東籬遐
想昔人高致霜菊盈叢還可採南山依舊橫空翠但悠
悠一點會心時君須記

大江東去

和答衛生襲之

道人活計本清虛掛壁素琴而已底事中心嘗悵悵不
足一人之毀人果何尤天無可怨政欲求諸己愧生於
內赧然其顙流泚聖道不遠於人步趨進退誰復能違
此好把藩籬多剖却看取成蹊桃李篤敬忠誠尚行蠻
貊豈不行州里三薰三沐為君准擬沉水

送楊國瑞西行兼簡仲宣生

悲哉秋氣覺天高氣爽澹然寥泝行李匆匆人欲去一
夜征鞍催發葉落長安鴈飛汾水怕見河梁別中年多
感離歌休唱新闌暮雨也解留人簷聲未斷窗外還懸
屑滿眼清愁吹不散莫倚心腸如鐵面目滄浪齒牙搖
落髣髴三分白故人相問請君還為渠說

次韻答彥衡

無堪老懶喜春來蔬筍勸加餐食底事東君留不住忙
似人間行客憂喜相尋利名羈絆心自無休息不如閒

早付他妻子耕織門外柳弄金絲落花飛不起東風無力濁酒一杯誰送我歡意都非疇昔致主無心蒼顏白髮敢更希前席功名蠻觸何須千里追北

水龍吟

壽舍弟菊軒

天高秋氣初清姑山汾水增明秀黃花紅葉輸香泛艷
恰過重九細拾金甌旋題新句滿斟芳酒況人生自有
安排去處須富貴何時有休說山中宰相不效斜川五

柳鉏犁自把山田耕罷雙牛隨後經史傳家兒孫滿眼
漸能承受待與君坐閱莊椿歲月作皤然叟

漢宮春

純甫生朝且有弄璋之喜賦此以賀

公子歸來笑平生湖海豪氣依然黃金散盡落魄誰識
當年世間底物解挽回鏡裏朱顏人共道愁須殢酒幾
回推向尊前聞說夢熊初兆喜一枝慰眼歲晚流連蜡
桃會須結子運偶三十詩書舊業要他時分付青氍毹

階照映卧看玉樹芝蘭

滿庭芳

山居偶成每與文翰二三子論文把酒歌以
侑觴亦足以自樂也

歸去來兮吾家何在結茆水際林邊自無人到門設不
須關蠻觸政爭蝸角榮枯事不到尊前應堪嘆清溪流
水東去幾時還此身何處著從教容與木鴈之間算躬
耕隴畝在我無難使把鉏頭為枕眠芳草醉夢長安烟

波客新來有約要買釣魚竿

歸去來兮漁歌樵唱覓愁愁在那邊承流委順萬事沒
機關眼底江山如畫松環抱脩竹當前君便有侯封相
印到此也須還人生消底物百年都付茆屋三間但卷
舒以道到了何難日月消磨雙鬢中原信未報平安蒙
頭睡日高慵起簾影上三竿

雪夜用前韻

萬籟收聲六花呈瑞小橋路斷江邊笑潮州刺史匹馬

藍關謾有清名十載一杯酒孤負生前爭如我圍爐小
酌和氣笑中還梅梢新月上芒鞋竹杖爛賞林間便銷
金低唱欲換應難勲業何須看鏡蓬窻底空卧袁安君
須記游魚失水那可上長竿

望月婆羅門引

癸卯元宵與諸君各賦詞以為樂寂寞山村
無可道者因述其昔年京華所見以望月
婆羅門引歌之酒酣擊節將有墮開元之

淚者二首

暮雲收盡柳梢華，月轉銀盤東風輕扇春寒玉輦通宵。
遊幸綵仗駕雙鸞，間鳴經脆管鼎沸鰲山漏聲未殘人。
半醉尚追歡，是處燈圍繡轂花簇雕鞍繁華夢斷醉幾
度春風雙鬢班，回首處不見長安。

鳳城春好玉簫金管恣遊盤，梅粧猶怯輕寒一曲清平。
妙舞掌上看，回鸞漸霓裳欲遍翠斂春山良宵易殘歌
別鶴惜餘歡，眼底浮華自滿塵浣吟鞍瘴牛私酒若真。

是京東夫子班身幸健敢復求安

蝶戀花

壽衛生襲之

二月山城春尚未柳弄東風恰吐黃金蘂占斷溪頭華
麗地多君先得閑中趣我為虛名相絆繫若自深藏不
識愁滋味世事無勞深著意年豐酒賤須勤置

聞鶯有感

鶉鴂一聲春已曉蝴蝶雙飛暖日明花草花底笙歌猶

未了流鶯又復催春老早是殘紅枝上少飛絮無情更
把人相惱老檜獨含冰雪操春來情莫人知道

壽山人湛然李生

巖菊開時霜信杳風雨無情又是重陽了茆舍疎籬人
不到床頭酩酊生微笑莫怪住山真小草顰損蛾眉愁
獨無人掃花底一盃須健倒醉中聽喚卿卿小

江城子

甲辰晦日立春

鷄棲行李短，轅車馬如蛙。畏途賒四十九年，疆半在天。
涯任使東風吹不去，頭上雪眼中花。甘泉宜稌復宜麻。
近山窠更宜瓜。明日新年聞健早還家，報答春光猶有。
酒傾白蟻，岸烏紗。

元日有感

數椽茆舍大如蝸，老生涯寄山家。遮眼文書隨分有些，
些自愧行年如伯玉。思往事，盡堪嗟。從他鼓吹沸鳴蛙。
鬢霜花晚來加。南北東西泛若水，中槎此去有身知。有。



道深自隱效龍蛇

牡丹

百花飛盡彩雲空
牡丹叢始潛紅
培養經年造化奪
天功
脉脉向人嬌
不語晨露重
洗芳容
却疑身在列仙宮
翠帷重
瑞光融
爍爍紅燈間
錯綠蟠
龍醉裏
天香吹欲盡
應有悟夜來風

塵事鞅掌每與願違緬懷山林蕭散之趣

几衢塵土浣儒冠
鏡中看失朱顏傾
倒囊資我欲買青

山剝種閑花多釀酒塵土外覓清懽功名餘事且加餐
老來閑豈天慳鐵笛橫吹牛背穩如船細馬更須馱二
草平地工作癡仙

漁家傲

送春六曲

龍尾溝邊飛柳絮虎頭山下花無數花底醉眠留杖屨
花上露隨風散漫飄香霧老去逢春能幾度不妨且作
風光主明日不知風共雨回首處夕陽又下西山去

不是花開常殢酒只愁花盡春將暮把酒酬春無好句
春且住尊前聽我歌金縷醉眼看花如隔霧明朝酒醒
那堪覩早是閑愁無著處雲不去黃昏更下廉纖雨

春去春來誰作主怨他昨夜江頭雨把酒問春春不語
頭懶舉亂紅飛過鞦韆去芳草淡烟江上路鷓鴣聲裏
斜陽暮風外榆錢無意緒空自舞如何買得青春住

一片花飛春已暮那堪萬點飄紅雨白髮送春情更苦
愁幾許滿川烟草和風絮常記解鞍沽酒處而今綠暗

旗亭路怪底春歸留不住鶯作馭朝來引過西園去
詩句一春渾漫與紛紛紅紫俱塵上樓外垂楊千萬縷
風蕩絮欄干倚遍空無語畢竟春歸何處所樹頭樹底
無尋處惟有閑愁將不去依舊住伴人直到黃昏暮
斷送春光唯是酒玉杯重捧纖纖手檀板輕敲歌欲就
眉黛皺翠環暗點金釵溜自笑而今成老醜鶯花依舊
情非舊楊柳自從春去後誰擡舉腰肢新也知人瘦

正月十四日夜有感而作

燈火蕭條春日暮荒山月上聞村鼓羈客閑愁知幾許
千萬縷人間沒箇安排處醉袖翩翩隨所寓冷然便以
風為馭指點虛無雲外路留不住東將入海隨烟霧

月上海棠

壬寅冬躬謁玉清壇下客有歌月上海棠者
乃玉清作也詞致高遠真遊乎方之外者
也明年晤友陳子颺過余山中始為屬和
因亦次韻以簡知音

住山活計宜閒早，身世滄溟一漚小。
日月兩跳丸，迭送人間昏曉。
朱顏換，風雪俄驚歲杪。
敝衣旋補，荷盈沼。筭騎鶴揚州，古今少。
休苦似吳蠶，剛把此身纏繞。
若知否，我自無心可了。

和答楊生彥衡二首

小樓舞徹雙垂手，使倩鴈將書寄。
元九舉首望南山，獨峨眉數峯明秀。
人未老，且任高歌醉酒。
莫將此樂輕孤負。
喚明月清風，做三友。
纖手折黃花，步東籬。
為伊三嗅。

英雄淚醉慍應須翠袖

時平無用經綸手且閑把文章和歐九天氣湛清秋便
無限山明水秀留客飲但願尊中有酒鴟夷到處須親
負尋山鳥山花好朋友塵世自薰蕕抱瑤英與君同嗅
西風外歸去長施布袖

同詩社諸君飲芹溪上

閑人不受春拘管被東風暗入羅帷暖草色近還無傍
溪陡覺金沙軟梅花蕾風味朝來不淺十分潋灩金蕉

滿兩頰潮紅百憂散不醉且無歸任門外玉繩低轉懼
娛地莫道書生冷眼

鷓鴣天

九日寄彥衡濟之魚簡仲堅景純二弟二首
點檢笙歌上小樓西風簾幙卷清秋綠醅輕泛紅萸好
黃菊羞簪白髮稠今古恨去悠悠無情汾水自西流澹
烟衰草斜陽外併作登臨一段愁

酒滿金尊客滿樓美人清唱眼波秋花隨酒令筵前散

香逐芳鬢坐上稠山歷歷水悠悠百年光景去如流直
須爛醉酬佳節莫惹人間半點愁

彥衡諸君皆有和章因復仍韻以寫老懷

不是秋來懶上樓龍鍾詩骨不禁秋舊歡去我如天遠
新恨撩人似髮稠空咄咄漫悠悠老來終是少風流千
金買笑佳公子醉卧瓊樓不識愁

青陽峽對酒三首

千丈長虹下飲溪兩山環合翠屏圍非魚定不知魚樂

得鹿還生失鹿悲
花藹藹絮霏霏
東風不染髮邊絲
百川尚有西流日
一老曾無却少時

此溪西
流故云

古木寒藤蔭小溪
溪邊更著好山圍
波間容與雙鷗淨
空外飄飄一鷁飛
湍浪瀉萬珠霏
風前天棘舞青絲
蘭亭豪逸今陳跡
不醉東風待幾時

颼颼輕舟送上溪
何時柳樹已成圍
貪看歸鳥投林急
不覺殘花入座飛
蘭櫂舉麴塵霏
新荷挽斷有餘絲
酒酣却對青山笑
面目蒼然不入時

上巳日再遊青陽峽用家弟誠之韻三首

瓦釜逢時亦轉雷
春江得雨浪崔嵬
不才分作溝中斷
偶得溪山一笑開
題姓字拂青苔
此翁來後更誰來
不須更待移時遣
俗駕聞風已自回

樓外殘雲走怒雷
西山晴色晚崔嵬
柳薰遲日千絲暗
花噴溫馨一夕開
須席地更茵苔
素琴橫膝賦歸來
一觴一詠風流在
牛背如船倒載回

古獄干將未遇雷
一生肝膽漫崔嵬
不將身向愁中老

剩把懷於笑裏開賢聖骨長寒苔君如不飲復何來使
從今日為頭數比到春歸醉幾回

暮春之初會飲衛生襲之家酒酣諸君請作
樂府因為之賦使覽者知吾輩之所樂也

五首

幼歲文章已自豪瞠然猶記兩垂髦從教酒債生前有
莫待詩瓢死後漂三萬日六千朝百年煊半是羈騷須
君自製黃金鱸醉我新篋玉色醪

醜酒槌牛詫里豪
臨流觴詠富詩髦
紛紛世態浮雲變
草草生涯斷梗漂
愁不寐夜難朝
廣陵散曲屈平騷
從今有耳都休聽
且復高歌飲楚醪

當日元龍氣最豪
而今塵土墊冠髦
紛紛落絮隨風舞
泛泛輕鷗逐水漂
拚一醉使千朝
文章休說僕奴騷
春來春去容顏改
輸我花前把碧醪

七字驪珠句法豪
老夫倒甲墮纓髦
興新不見明何謂
雷雨無聲麥已漂
窮研墨幾昏朝
星星鬢髮半刁騷
從

人笑我冬烘甚猶可尊前舉罰醪

把酒簪花彊自豪花枝羞上阿翁髦不教春色因循過
忍為虛名孟浪漂醒復醉莫還朝紛紛四海正兵騷從
渠眼底桑田變且樂床頭潑甕醪

和答尋正道

襯步金沙村路遙歸來羞費楚詞招蜂粘落絮行池面
蝶避遊絲過柳橋方外友仗誰邀定於驢上作推敲窮
愁正要詩料理莫問春來酒價高

臨江仙

壽周景純

仲蔚門牆蓬藿滿幽居不用聲華醜妻惡妾勝無家學
須勤苦就富貴豈天耶鼻壘未除片木運相望咫尺天
涯芹溪猶有折殘麻此心終莫展遲汝對巖花

三月十日與諸君約會西園久而不至花又
狼藉因賦此以排悶

人道花開春爛熳花殘春便無情小園獨自遶花行是

非何日定洗耳聽江聲芍藥牡丹俱不見風枝猶有殘
英階前桀葉已成陰所期猶未至何日倒吾瓶

幽懷用前韻

白首老儒身連蹇不隨時世紛華儘他人笑魯東家皇
天如欲治舍我復誰耶此道未行應有待何須恐慮無
涯男供耕穫女桑麻薄軀何所事問柳與尋花

浣溪沙

壽衛生行之

莫說長安行路難休歌骭饜倚門邊且將見在闢尊前
人意十分如月滿月明一夕向人圓年年人月似今年
元夜後一日史生仲恭久客初還酒間喜為

賦此

馬上風吹醉帽偏一川晴雪裊吟鞭冷雲堆裏指山巔
慈母已占烏鵲喜佳人望月拜嬋娟今宵人月十分圓

壽菊軒弟

白髮相看老弟兄閑身無辱亦無榮兒孫已可代躬耕

了却文章千載事不須談笑話功名
青山高卧待昇平
訴衷情

初夏偶成

東風簾幙雨絲絲
梅子半黃時
玉簪微醒醉夢開
却兩三枝初睡起
曉鶯啼倦彈碁芭蕉初綻
徙倚湖山綵筆題詩

卜算子

正月上旬夜夢寐間聞雪作
詰旦起視但雲

烟出沒曉山濃淡如畫西望長河僅一髮
耳作長短句以寫一時勝槩

澹月晃書窻夜靜雲檢亂欹枕蕭蕭聽雪聲落葉閑階
滿清曉獨開門淡蕩東風軟詩句成時墮渺茫眼底江
天遠

南鄉子

壽縣大夫薛君寶臣

五福幾人全我見君侯得處偏素著藹然鄉曲譽喧傳

盡道新官似舊官
五袴復歌廉竹馬
兒童更可憐
萬室春風和氣裏
鳴弦好似今年勝去年

最高樓

壽衛生行之

并序

衛生行之少流寓兵革中既長始知讀書
其立志剛信道篤而家苦貧年饑諸幼滿
前雖併日而食不卹也暇日賓友飲酒賦
詩為樂余既嘉其有守喜為稱道於其始

生之日作樂府以歌詠之俾觀者知吾行之之為人矣

貧而樂天命復奚疑兒女聚嬉嬉東村邀飲香醪嫩西
家羞饌蕨芽肥把年華都付錦囊詩白髮青衫是人所
惡金印碧幢是人所慕顧吾道是耶非山妻解煮胡麻
飯山童自製薜蘿衣問人生須富貴是何時

點絳脣

暮夜晨起書所見

愛酒淵明無錢休對黃花語一杯誰舉寂寞空山去屋
上青山山上行雲度悠然處是中真趣欲寫還無句

西江月

久雨新霽秋氣益清與二三子登高賦之

人與寒林共瘦山和老眼俱青瑒然一葉不須驚葉本
無心入聽氣爽雲天改色潦收烟外無聲夕陽洲外片
禽鳴涵泳一江秋影

二妙集卷七

欽定四庫全書

二妙集卷八

金 段克己

段成己 撰

樂府

滿江紅

張丈信夫林亭小酌感事懷人敬用遯菴先

生韻 以下成己作

光景催人還又是西風吹袂青鏡裏滿簪華髮不堪憔悴



悴一月幾逢開口笑十年滴盡傷時淚倩一尊相對說
清愁花前醉初未識名為累今始覺身如寄把閑情換
了平生豪氣致主安民非我事求田問舍真良計看野
雲出岫却飛回元無意

新春敬用遜菴韻

料峭東風吹醉面向人如舊凝竚立野禽聲裏無言搔
首庭下梅花開盡也春痕已到江邊柳待人間事了覓
清歡身先朽菟裘計何時有林下約床頭酒怕流年不

覺鬢邊還秀往事不堪重記省舊愁未斷新愁又把春
光分付少年場從今後

偶覩春事闌珊謹用兄韻以寫所懷

點檢花枝風雨外雪堆瓊蘊春去也朱絲絃斷驚膠難
續眼底光陰容可惜舊游回首尋無跡對青山一餉倚
枯藤灘聲急人已老身猶客家在邇歸猶隔縱語音如
舊形容非昔芳草綿綿隨意綠平波渺渺傷心碧到愁
來惟覺酒杯寬人間窄

遯菴兄以閔菊樂府見示三復之餘倚歌和

之

誰把秋香偏著意植根姑射塵土外鮮鮮元有可人容
質日久漸隨蕪共沒歲寒還與松同潔傲新霜還有兩
三枝天應惜巾自漉醅微白人已老歡猶昔愛此花不
負淵明清節醉裏不知人世換悠然獨倚西風立問此
中時復慰窮途何須泣

大江東去

寄衛生襲之

干戈蠻觸問渠爭直有幾何而已畢竟顛狂成底事謾
把良心戕毀坐穴藤床磨穿鉄硯自有人知己摩挲面
目不應長為人泚過眼一線浮華辱隨榮後身外那須
此便恁歸來嗟已晚荒盡故園桃李秋菊堪餐春蘭可
採免更煩鄰里孫郎如在與君共枕流水

送楊國瑞西歸

西風汾浦鴈初飛秋水渺茫無際有底忙時來復去泛

若虛舟不繫離菊將開村醪初熟且住為佳耳笑言相
答箇中史隱無愧歲月不貸閑人君顏非少我髮白如
此好把金杯休去手萬事惟消沉醉日轉山腰馬嘶柳
外歌闌行人起憑高西望相思目斷烟水

贈答楊生彥衡

暮年懷抱對水光林影欣然忘食推手功名非我事閑
處聊為閑客世故多虞人生如寄一榻容安息髭絲千
丈誰家機杼堪織三徑松菊猶存誅茅難機時借鄰翁

力酒滿芳尊山滿眼此意無今無昔平地風波東華塵
土不到幽人席興來獨往溪南還又溪北

木蘭花慢

元宵感舊

金吾不禁夜放簫鼓恣遊遨被萬里長風一天星斗吹
墮層霄御樓外香暖處看人間平地起仙鰲華燭紅搖
醉勒瑞烟翠惹吟袍老來懷抱轉無聊虛負可憐宵遇
美景良辰詩情漸減酒興全消思往事今不見對清尊

瘦損沈郎腰惟有當時好月照人依舊梅稍

滿庭芳

齋居有感敬繼遜菴兄韻

鏖戰文場橫揮筆陣萬言一策平邊春雲穩步逸氣益
賢關致主堯虞堂上真儒事直欲追前回頭錯問中風
味一笑覺都還百年都幾日何須抵死著意其間尋一丘
一壑此固無難遁跡月蘿深處風吹夢不到長安渾無
事牀頭睡起簷日已三竿

望月婆羅門引

清明後醉書於史氏之別墅二首

東風嫋嫋飛花一片點征衣等閑耗損香霏春去春來
無跡靜裏幾人知問沈郎何事帶減腰圍功名願違筭
此計未應非剌把閑愁殢酒幽興裁詩溪山好在悵眼
中渺渺故人稀回首處清淚如絲

繁華夢斷吹花風起却添衣滿庭紅雨霏霏獨倚繩床
微嘆此意竟誰知恨西園轉眼翠幙成圍事無我違覺

四十九年非便好忙開蔣徑細和陶詩風流已置撫遺
編三嘆賞音稀人不見絃斷朱絲

翌日封生仲堅見和因復前韻以答

小窻睡起曉寒特地怯春衣篝爐坐擁殘霏衮衮愁來
何處獨有兩眉知情一尊聊爾為解重圍賞心莫違桃
李事轉頭非幾曲昇平舊譜數首新詩花開正好筭一
春風雨未應稀舒醉袖惹住遊絲

晨起與仲堅偶坐少焉雨作其聲洒洒然絕

似文場下筆時因偕前韻戲成一篇

蹉跎歲晚床頭鐵硯已生衣
破窻風送輕霏暗裏隨風
入夜花上早先知聽一時下筆鏖戰文圍天心不違更
問甚是和非便著春衫換酒醉墨題詩逢場作戲覺賞
心樂事未全稀還自嘆虫吐餘絲

仲堅復見和文勢疊疊殊覺逼人可謂不負
忍窮矣而其言若有所感因取舊韻述已
意以答之雖知荒於辭章猶賢於無所用

心也

長安倦客不堪重整舊朝衣
天香尚帶餘霏蓋世虛名
何用政爾畏人知
愛青山屋上面面屏圍
十朋弗違好事外卜皆非
辨取殘年香火暇日歌詩
東塗西抹笑顛狂如我向來
稀休看鏡鬢髮如絲

江城子

李春五日有感而作歌以自適也

百年光景霎時間
鏡中看鬢成斑
歷遍人間萬事不如

閑斷送餘生消底物
蘭可佩菊堪餐
功名場上稅征鞍
退時難處時安生
怕紅塵一點污儒冠
便甚歸來嗟已晚
那更待買青山

階前流水玉鳴渠
愛吾廬愜幽居
屋上青山山鳥喜
相呼少日功名空自許
今老矣欲何如
閑來活計未全疎
月邊魚雨邊鋤花
底風來吹亂讀殘書
誰喚九原摩詰

起添畫我輞川圖

一作憑畫
作倦游圖

幽棲追和遜菴先生韻

昔年兄弟共彈冠轉頭看各蒼顏千古功名都待似東
山慷慨一杯風露下追往事敘幽歡晨霞翠柏尚堪餐
養餘閑未全慳十丈水花況有藕如船醉裏忽乘鸞鶴
去塵土外兩癯仙

東園牡丹盛開二三子邀余飲花下酒酣即
席賦之

水南名品幾時栽映池臺待誰開應為詩人著意巧安
排調護正須宮樣錦遮麗日障飛埃曉風吹綻瑞雲堆

怨春回要詩催醉墨淋漓隨手洒瓊瑰歸去不妨簪一
朶人也道看花來

行香子

書舍偶成

自嘆勞生枉了經營到而今一事無成不如趁早覓箇
歸程向渭川漁東市卜富春耕眼底浮榮身外虛名儘
輸他時輩崢嶸得偷閑處且遠閑情有坐忘篇傳燈錄
洗心經

月上海棠

謹次遜菴兄繼玉清韻

酒杯何似浮名好一入枯腸泰山小喚醒夢中身鵲鳩
數聲春晚昂頭處幾點青山屋杪人生得計魚遊沼視
過眼光陰向來少須卜一枝安笑月底驚烏三繞無窮
事畢竟何時是了

重九之會彥衡賦詞侑觴尊兄遜菴公與坐

客往復賡歌至於再四語意益妙殆不容

後來者措手彥衡堅請余繼其後勉為賦
之

黃花未入淵明手日攪空腸幾回九山色繞吾廬酒是
當年^闕秀忘言處此意何嘗在酒等閑莫把良辰負恨
不見平生舊親友三徑久荒涼籬下落英誰嗅傷時淚
不覺沾襟漬袖

老來還我扶藜手想豪氣十分已無九都把濟時心分
付與一時英秀還自笑潦倒猶堪殢酒從前枉被虛名

負何似尊前賢聖友纖手斫金蘂一嚼不妨時喫頽然
醉卧印蒼苔半袖

冬至後一日獨居無悰復用前韻

光陰輸與閑人手屈指窮冬又初九風雪擁柴關竹外
一枝梅秀醅瓮熟似笑淵明止酒溪山舊約吾無負使
結無情歲寒友世味儘醇醴掩鼻向伊慵喫蓬茅底有
手何妨且袖

詩社諸君復相屬和又不免步韻獻笑

秋風鶴髮雙龜手不如意事十常九蓬蒿映閑階嗟叢
菊汝奚為秀衡門掩問字無人載酒永為道德心初負
向上將求古人友三嘆抱遺編藹餘馥殘膏誰嗅趣時
樣競銜羔裘豹袖

鷓鴣天

重九日敬用遯菴兄韻三首

那得工夫上酒樓誰家皮裏更陽秋但教閑事心頭少
免致清霜鏡裏稠休咄咄儘悠悠佳時來往亦風流百

年光景無多子請向尊前聽解愁

手段慙非五鳳樓題詩把菊負清秋黃柑旋拆金包嫩
白酒新蕩玉液稠身外事付悠悠牛山何必涕空流不
如且進杯中物一酌能消萬古愁

豪氣消磨百尺樓憂來一日抵三秋故人落落晨星少
新塚縈縈塞草稠思往事去悠悠夕陽回首忽西流葉
聲偏入愁人耳聲本無心人自愁

上巳日陪遜菴先生遊青陽峽四首

瀲灩春江走怒雷，翠巖千丈立崔嵬。
山英似與遊人約，盡放浮雲一夕開。
傾綠酒，坐蒼苔，大書歲月記曾來。
直將酩酊酬佳節，挽住春光不放回。

不卹枯腸殷夜雷，一杯宵次失崔嵬。
暫將平昔看書眼，移向溪山好處開。
從健倒卧莓苔，明朝有酒更重來。
百年光景無多子，爛醉溪頭得幾回。

冷卧空齋鼻吼雷，野禽呼我上崔嵬。
幽懷畢竟憑誰寓，笑口何妨對酒開。
岩鎖蕙徑封苔，愛閒能有幾人來。
虛

名蓋世將何用引斷長繩喚不回

三月寒潭未起雷臨流照影笑崔嵬詩無好句願難解
尊有芳醪手自開山下石水邊苔春風來似不曾來酒
闌偶起飛花去路斷前溪笑却回

再遊青陽峽奉和邀菴兄韻二首

行徹南溪到北溪山回萬馬合長圍花如有舊迎人笑
雲自無心出岫飛揮醉墨帶烟霏婆娑醉舞拂青絲昔
時心賞今猶在但恐風流異昔時

瀑布巖前水滿溪
青陽廟下四山圍
歌殘白雪雲猶佇
舞落烏紗鳥忽飛
迷晚色鎖晴霏
野花如綺柳如絲
一尊不惜顏然醉
明日重來已後時

立春後數日盛寒不出因賦鄙語敬呈邀菴

尊兄一笑四首

擺脫浮名儘日間
人間萬事一蒲團
歸田老去方知樂
行路今來始覺難
山雪盛草堂寬
客床輾轉若為安
甫能望得春消息
一夜東風特地寒

誰伴閑人閑處閒梅花枝上月團圓陶潛自愛吾廬好
李白休歌蜀道難林壑靜水雲寬十年無夢到長安五
更門外霜風惡千尺青松傲歲寒

那得茅齋一餉閑地爐敲火試龍團頭從白後彈冠懶
脚自頑來應俗難塵世窄酒杯寬百年轉首一槐安是
非臧穀何時了隱几西窗日色寒

堂上幽人睡正閑門前聲利聚為團花香惱夢尋無處
詩句撩人寫復難空自嘆情餘寬驚鳥三繞幾時安青

山隔岼迎人笑舊有盟言且莫寒

上巳日會飲衛生襲之家園

千古蘭亭氣象豪當時座上盡英髦
林藏修竹依山靜花逐流觴信水漂
悲往事樂今朝雖無絲竹有風騷
回頭一笑還塵跡莫厭尊前醉濁醪

殢酒償春笑二豪題詩品物愧時髦
心如幽鳥忘機靜身似虛舟到處漂
須富貴是何朝一杯聊慰楚人騷
逢花堪賞應須賞座有佳賓尊有醪

和答尋正道

鵬翼翩翩去路遙歸來羞費楚詞招讀書未免終投閣
沽酒何妨暫過橋風與月不須邀時來閑處伴推敲兒
童也笑翁慵甚睡起床頭日已高

臨江仙

奉繼遜菴先生韻二首

十載龍門山下路夢魂不到京華此身著處便為家窮
通吾有命不樂復何耶萬事尊前供一笑浩然逸興無

涯詩人休更詠丘麻東風吹酒醒冷眼有飛花

四十六年彈指過蒼顏換却春華在家居士已忘家誰
人知此意袖手向毗耶世故驅人何日了深流不見津
涯軟腸一鉢有胡麻紛紛身外事渺渺眼中花

田間閑步偶成

管領韶華成老醜有情爭似無情芒鞋竹杖葛衣輕悠
悠身外事寂寂水邊行眼底光陰猶是夢何須身後虛
名仰天一笑絕冠纓東風歸路穩十里暮山青

李山人壽

濁酒一卮歌一曲大家留住秋光片雲輕護曉來霜殷
勤籬下菊滿意為君香四海干戈猶未定此身底處安
藏醉中聞說有真卿便從今日數三萬六千場

暮秋有感四首

濁酒一杯歌一曲世間萬事悠悠閑來興一登樓西
風吹葉脫盡見四山秋自古興亡天不管屈原在楚江
流寸心禁得許多愁茫然成獨笑白鷺起滄洲

轉眼榮枯驚一夢百年光景悠悠浮生擾擾笑何樓試
看雙鬢上哀颯不禁秋古往今來多少事一時分付東
流五更枕上調清愁笛聲何處起明月蓼花洲

走遍人間無一事十年歸夢悠悠行藏休更倚危樓亂
山明月曉滄海冷雲秋詩酒功名殊不惡箇中未減風
流西風吹散兩眉愁一聲長嘯罷烟雨暗汀洲

自笑荒才非世用功名都付悠悠斷腸怕上夕陽樓滿
瀟楓葉下漠漠葦花秋日月不知忙底事東生又復西

流古人不見使人愁秋蘭無處採流水滿芳洲

驀山溪

衛生襲之壽

杏花半吐花底香風度楊柳媚金絲拂晴波垂垂萬縷
東君著意付與有情人山下路水邊村總是堪行處春
光幾許不用忙歸去呼取麴生來把閑愁一時分付大
都是醉三萬六千場遇有酒且高歌留取青春住

蝶戀花

衛生襲之生朝吾兄作歌詞以壽之余獨無
言生執卮酒堅請不已勉用兄韻以答其

意

點檢東園花發未蝶遶芳叢馥馥香浮蘂買酒酬春君
有地不妨日涉聊成趣身世虛舟元不繫浮利浮名是
甚閑情味花下一杯方得意人間萬事宜姑置

明日衛生見和復次韻

燕子歸來寒食未脉脉桃花微露胭脂蘂回想舊遊歌

舞地狂詩顛酒當時趣白日長繩誰可繫老去情懷事
事都無味倦鳥知還非有意忙時宜用閑時置

浪淘沙

惜花

好箇杏花時只怕寒欺東君無意惜芳蕤雨橫風狂都
不管儘得禁持瘦損一分肌著甚醫治一天春恨沒尋
思怎得丁寧雙燕子說與春知

朝中措

偶出見牆頭杏花喜而賦之

無言脉脉怨春遲一種可憐枝最是難忘情處牆頭微
露些兒十分細看風流却在一半開時政要東風擡舉
莫教吹破胭脂

南鄉子

衛弟行之壽

蘭玉衛諸郎我見白頭子最良說似向人人不會何妨
靜裏誰知竹有香歲月沒商量暗地催人兩鬢霜三萬

六十須實數休忙才是東風第一場

薛寶臣生朝

俱用薛八實事

郡姓記名先烏鵲翔飛瑞自連聞在兒時人已憚他年
又作河東一鳳傳佳政訟分嫌看賦春遊第幾篇躡蹻
誰為門下客休嘆換却先生苜蓿盤

木蘭花

前重陽幾日離下始見菊放數花嗅香按藥
慨然有感而作以貽山中二三子四首

人生行樂須聞早休惜一尊花下倒無情歲月不相饒
轉首吳霜紛莫掃佳時苦恨懽悰少鏡裏衰顏難更好
試將離恨說渠儂天若有情天亦老

不才自合收身早一座青山成潦倒蒙頭贏得日高眠
落葉滿庭慵不掃殺人四海知多少留住頭皮貧亦好
年年種菊待花開不道看花人漸老

尊鱸江上秋風早四海狂瀾驚既倒明知不是入時人
閉戶十年成却掃故人落落晨星少紅葉黃花依舊好

登臨信美自然情坐覺光風容易老

醉中昨夜歸來早應怕蒼苔嗔健倒一尊開健莫蹉跎
過眼光陰如電掃破除萬事心頭少酒自於人情味好
醒時還醉醉還醒賴得此鄉容我老

清平樂

薛子余弄璋

東君調護錯愛春遲暮一葉蘭芽今始露香滿君家庭
戶抱看玉骨亭亭精神秋水分明自是人間英物不須

更試啼聲

送張君美經歷之任安西幕

雞聲戒曉催工長安道賓幕雍容年正妙人物風流溫
嶠政成海泳江涵門闌剩有餘閑公事不妨行樂春風
韋杜城南

訴衷情

史仲茶壽

芹溪清淺舞連漪墮釣錦鱗肥黃花一尊芳酒萬事覺

俱非留晚景惜香霏醉時歸最關情處迎門稚子一笑牽衣

水調歌頭

山中偶成用遜菴兄韻


人生等行旅能費幾春秋元龍謾矜豪氣百尺卧高樓
昨日青青雙鬢今日星星滿鏡轉首歲華流歸去使歸
去何處覓菟裘一枝筇一壺酒寄真游姑山玉立千仞
直下看神州欲語幽情誰可賴有白鷗知我塵世儘悠

悠一笑對妻子出處不須籌

顯祖遯菴君與從祖菊軒君才名道業推重一世值金季亂亡辟地龍門山中遯菴君既歿菊軒君從晉寧北部閉門讀書餘四十年優游以終凜然清風視古無愧其遺文惜多散逸所幸存者古律詩樂府三數百篇皆先侍郎手自紀錄屢欲傳梓不克小子不肖痛先志之未遂懼微言之或泯謹用錄梓藏之家塾俾後之子孫

毋忘先業云泰定四年丁卯春別嗣輔拜手謹

誌



二妙集卷八